


TEZAUUR LITURGIC
27 AUGUST

SLUJBA
SF.PREOT
IOAN
GAȘKEVICI
DE LA
KORMIANSK



MOSCOVA, 2000



Служба святому праведному Иоанну Кормянскому

На велицей вечерне

Поем Блажен муж: первый антифон.
На Господи возвах: поставим стихов 8,
и поем стихиры, глас 3:

Приидите празднующи, увенчаем песнми
солнце незаходимое и едиными устнами
восхвалим светило великое, пастыря доброго
пресвитера Иоанна, образ жизни во Христе нам
являшаго, и молитвою пламенною бесы
поправшаго, Церкви Российской новую похвалу,
земли Белорусския сокровище неистощимое, и
царства Божия небожителя, егоже молитвами да
спасет Христос души наша. (дважды)

Путь неложный показал еси нам, блаженне, како
подобает мирскую суету оставляти и Христу
Жениху Небесному угождати, уподобитися пяти
девам мудрым и светильники душ наших
уготовати во тьме сущей, дела добрыми озарити
вход Христа, и совнити с Ним на брачный пир,
отрешиться суеты мира сего, да твоими
молитвами и нас приведеш ко Христу Спасу
душ наших. (дважды)

Всем сердцем возжелал еси работати Господеви,

с юных лет во храме обретался еси, пением и чтением благоугождая Христу, возгорелся еси из глубины души, и последовал стопам достопамятного отца твоего, место славное у Престола себе обретая, любовьию пламенея, николи же зла за зло воздая, но яко птенец кроткий молитву изливал еси Господеви, да даст ти место служения храм Девы Марии, Еяже молитвами и нас ко Христу приведи, отче праведный наш Иоанне.

Всех нищих и убогих ублажал еси, всем подавая не токмо на пользу телесную, но и молитвами твоими, души убогие благодатию Духа обильно наполняя, трудолюбие жилища в себе показуя, поучал труды к трудом прилагати, со смирением и молитвами крест свой понести, и тако труды земными сотворити в душе своей Царство Небесное, да изыдет Христос и обрящет храмину добрую, украшенную трудами добродетельными, подвиги многими и молитвами теплыми, сияющи чистотою покаяния: да и мы обрящем сердца наша чистыми, почитающе блаженную память твою, отче наш Иоанне.

Путеводящая звезда, озаряющая мрак жития нашего, явился еси нам праведне Иоанне, во тьме века неверия возсиявшая, светом своим путь просветившая, и многи ко спасению приведшая, лучами благодати покрывшая, и не

отринувшая нас от единыя Надежды — Христа, указавшая во мраце жития — Свет, Свет возсиявший на спасение душ наших.

Сердце чисто созиждет в тебе Господь, показуя нам правило веры и образ кротости, смирения пучину великую, милосердия источник неиссякаемый, покаяния слезы преизрядныя, милости подателя благаго, миротворца и молитвенника причудна, ангела земнаго и человека небеснаго, жителя Иерусалима горняго, небесных чинов сослужителя и на небеси сожителя, о Церкви Российстей теплаго предстателя, и земли Белорусския чудотворца предивна.

Слава, глас 1:

Сердцем веровал еси в правду, священниче Божий, устны же глагола еси во спасение: Господь крепость мне даст, Господь миром меня оградит, Господь сила моя, Господь слава моя, Господь разум мой утвердит, Господь наставит мя ко спасению, Господь в сердце моем поживет, и соделает душу мою храмом Своим. Тако и мы тебе вопием: Господь прослави тя на небеси, и мы грешнии прославляем тя на земли.

И ныне, догматик, глас тойже.

Вход. Прокимен дне. Чтения три.

Притчей чтение (глава 13, стихи 20 – 23, 25 – 26,
глава 14, стихи 1 – 6):

Желания благочестивых наслаждают душу: дела же нечестивых далече от разума. Ходяй с премудрыми премудр будет: ходяй же с безумными позна^н будет. Согрешающих постигнут злая: праведных же постигнут благая. Благ муж наследит сы^{ны} сыно^в. Праведнии наслаются в богатстве лета многа: неправеднии же погибнут вскоре. Иже щадит жезл свой, ненавидит сына своего: любяй же наказует прилежно. Праведный ядый насыщает душу свою: души же нечестивых ску^{дны}. Мудрыя жены^и создаша до^{мы}: безумная же раскопа^и рукама своима. Ходяй право, боится Господа: развращаяй же пути своя, обесчестится. Из уст безумных жезл досаждения: устне же мудрых хранят я. Идеже несть волов, я^{сли} чи^{сты}: а иде^{же} жи^{та} мно^{го}, явна волу^и кре^{пость}. Свиде^{тель} ве^{рен} не лжет: разжиза^{ет} же ло^{жная} свидетель неправеден. Взы^{щещи} премуд^{рости} у злых, и не обря^{щещи}: чувство же у мудрых удо^{бно}.

Премудрости Соломона чтени
(глава 3, стихи 1 – 9):

Праведных же души в руке Божией, и не прикоснется их мука. Непщевани быша во очию

безумных умереть, и вменися озлобление исход их: они же суть в мире. Ибо пред лицом человеческим аще и муку примут, упование их бессмертия исполнено: и в мале наказани бывше, великими благодетельствовани будут, яко Бог искуси их и обрете их достойны себе. Яко злато в горниле искуси их, и яко всеплодие жертвенное прият я. И во время посещения их возсияют, и яко искры по стеблию потекут: судят языком и обладают людьми, и воцарится в них Господь во веки. Надеющиеся на нѣ уразумеют истину, и вернии в любви пребудут Ему, яко благодать и милость в преподобных Его и посещение во избранных Его.

Пророчества Иоилева чтение
(глава 2, стихи 27 – 32):

Такъ глаголетъ Господь: и уведите, яко посреде Израиля Аз есмь, и азъ Господь Богъ вашъ, и несть иного разве Мене: и не посрамятся ктому людие Мои во векъ. И будетъ по сихъ, и излию отъ Духа Моего на всяку плоть, и прорекутъ сынове ваши и дщери ваша, и старцы ваши сония узрятъ, и юноты ваши видения увидятъ: ибо на рабы моя и на рабыни моя во дни оны излию отъ Духа Моего: и дамъ чудеса на небеси и на земли, кровь и огонь и курение дыма: солнце обратится во тму, и луна в кровь, прежде неже прийти дню Господню

великому и просвещенному: и будет, всяк иже призовет имя Господне, спасется.

Стихиры на литии, глас 6:

Образ пастыря доброго зрим в тебе, отче Иоанне, яко не наемник был еси, а пастырь истинный стада Христова, овцы словесныя пасый, и волцы хищныя — грехи, молитвою пламенною отгонял еси, и ныне от нас отжени помыслы студныя и безумныя, да вопием прославившему тя Христу: слава тебе Боже во веки.

О крепосте моя Сыне Божий, о свете ума моего, и мире, и радости сердца моего от невидимых враг Избавителю мой, слава Тебе, тако взывал еси, отче праведне, вразуми и нас возвати всем сердцем Господеви: Иисусе Спасе наш, молитвами праведнаго Иоанна спаси души наши.

Сын Божий, пришедый в мир призвати к покаянию мытари и грешники, блудницы не отверже, и двери рая разбойнику отверзе, тако и ты отче Иоанне, к покаянию призва всех научи вопити мытаревым гласом: Боже, милостив буди мне грешному, Боже, очисти грех мой, слава Тебе.

Слава, глас 8:

Молящися, Духом святым молимся, сего ради вся молитвы церковныя, дыхание Духа Святаго суть, и вси православнии рожденнии от него есмы. Прииди убо и вселися в ны Душе Святый, помилуй и соедини вся ны, да будем едино Тело Христово. Такова бысть непрестанная молитва твоя, праведный Иоанне, и послуша тя Бог, и помаза тя елеем радости вечныя.

И ныне, Богородичен, глас той же:
Кто повесть величия Твоя, Пресвятая Дево, небесная палато и руно Гедеоново, Христа Бога плотию нам родшая, величаем величия Твоя купно с праведным Иоанном, и едиными устнами Тебе вопием: Радуйся, обрадованная, Господь с Тобою.

На стиховне стихиры, глас 2:

Отче праведне наш Иоанне, житие твое на земли славно, и успение со святыми; смерть тебе бысть приобретение жизни вечныя, телесем нетленным с нами пребывая, и любовьию всех согревая, молися о нас Христу Богу нашему, мир церкви нашея даровати, и душам нашим велию милость.

Стих: Расточи, даде убогим, правда Его пребывает во век.

Отче блажение Иоанне, новая звезда

возсиявшая над землею русскою,
совокупившаяся лику древних святых, и
прославленная архипастыри и пастыри, и всеми
верными чадами церкви православныя, озари и
нас светом сияния славы Сына, Предвечнаго,
Отца Небеснаго, Бога безсмертнаго, во спасение
душ наших.

Стих: Готово сердце его уповати на Господа.
Отче премилостиве Иоанне, в житии бо твоём
праведному Филарету поревновав. Имея
богатство тленное ни во что вменил его, нищих,
сирот и вдовиц одарил еси, сим богатством
тленным приобрел еси у Христа богатство
нетленное, и по слову его обогатился тамо идеже
ни червь, ни тля, ни татие не крадут, но
пребывает оное вечно. Палаты незримыя в
Царствии Божиим создал еси, да и нас
молитвами твоими вселиши в ня.

Слава, глас 4:

Радуйся, сокровище нетленное на небеси
стяжавый. Радуйся яко тамо вечно пребываеши,
и нас грешных на земли не оставляеши.
Радуйся, яко мощи твоя нетленные яви нам
Господь, да возрадуемся и мы, видяще нетление
телесе твоего, яко Господь тя тако прослави.

И ныне, глас той же:

О, чудо велие мне! Ибо камень дражайший во
мне почивает. Тако глаголет церковь

Покровская. И откуда он преселился в мя! Тот, кто место славное мне предуказа, в прославлении имени Девы Марии, из Нея же родися Христос плотию, он же плотию нетленною во мне почи. О, чудо, Пресвятая Дево! Како вмещаю его, он же мя создати строители благослови, да и аз прославлю его, имене ради святого Твоего.

По Ныне отпускаеши: тропарь святому дважды и Богородице Дево: единожды; аще же ни: Слава, святому, и ныне, Богородичен по гласу тропаря.

Тропарь, глас 4:

Святче Божий, отче наш праведне Иоанне, пресвитере славне стада Христова, свято житие твое совершив, даром прозрения и исцеления Господь ты одари, и ныне нетленным телесем с нами пребывая, моли Христа Бога нашего, да спасет Господь души наша, почитающих, блаженне, святую память твою.

На утрени

На Бог Господь: тропарь святаго, дважды.
Слава и ныне: Богородичен по гласу тропаря.

По 1 стихословии седален, глас 5:

Знаменiem крестным и молитвою вражия
искушения победил, постом и воздержанием
Господеви благоугодил, тем же и приял от
Христа Спаса дар исцеления и прозрения,
подавай и нам вся яже на потребу у тя просяще,
с верою притекающим к честным мощем твоим.

Слава, и ныне, Богородичен:

Ужасно чудо зачатия, и несказанен образ
рождества в Тебе познася, Приснодево Чистая,
ужасает мой ум и удивляет помышление слава
Твоя, Богородице, всем прострися во спасение
душ наших.

По 2-м стихословии седален, глас 1:

К Божественной высоте твоя руке воздев
праведне, явился светоносне Иоанне, край
земли Белорусския осветив, да возрадуется
собор ея, звездою новою преукрашенный,
ходатая ты приобретши дивнаго и славнаго,
люди веры правыя вопиют ти: спасай нас, отче
преблаженне, молитвами твоими.

Слава, и ныне, Богородичен:

Богородицу Тя прославляем, прославляющи
дивнаго угодника Твоего Иоанна, яко
предвозвести нам пришествие Твое во храм, да
чудо с пастырем сотвориши, и место славное
стопами святыми Твоими освятиши, моляще
Сына Твоего спастися душам нашим.

Полиелей и величание:

Величаем тя, святой праведный отче Иоанне, и
чтим святую память твою, ты бо молиши за нас
Христа Бога нашего.

Псалом избранный:

Блажен муж бояйся Господа, в заповедех Его
восхощет зело.

Седален по полиелеи, глас 3:

Отче Иоанне, алтаря Господня служителю,
избранниче Божий, веры православныя
ревностный проповедниче, был еси вместилище
благодати Христовой, яко дарова тя Господь
пастыря добра стаду Своему. Моли, отче святе,
еже чадом Божиим нам быти, и спастися душам
нашим молитвами твоими.

Слава, и ныне, Богородичен:

Купину неопалимую и лествицу высокую,
кадильницу златую и манну небесную, жезл

Ааронов и руно Гедеоново, Евы избавление и раю словесный, Церкви Православныя похвала и наше спасение в Тебе, Дево чистая обретаем мы земнороднии, да Твоим ходатайством и молитвами соделаемся достойни Царства Божия, благочестно покланяющияся пресвятому рождеству Твоему.

Прокимен, глас 4: Священницы Твои оденуты в правду и преподобнии Твои возрадуются.

Стих: Помяни, Господи, Давида и всю кротость его.

Евангелие от Луки, зачало 26
(глава 6, стихи 31 – 36).

По 50-м псалме стихира, глас 6:

Праведных мужей ревнителя, блаженного отца нашего и учителя Иоанна, сошедшее восхвалим глаголюще: радуйся, похвало веры православныя, благодатию и истиною освященная, отонудуже и приятилище был еси Духа Всесвятаго. И ныне со всеми святыми престолу Христову предстоя, молися присно о рабех Его, почитающих блаженную память Твою.

Канон, глас 4,
егоже краеграние сие: Пою праведному Иоанну
песнь праведную.

Песнь 1.

Ирмос: Моря чермную пучину невлажными
стопами древний пеществовав Израиль,
крестообразныма Моисеовыма руками
амаликову силу в пустыне победил есть.
Похваляюще мне твое житие, яко ко Христу
дерзновение стяжав, от богатых Духа сокровищ
каплю разума дати ми, молюся, яко да достойно
похвалите тя возмогу, хвалы достойного.
Отечество наше возрадовашеся, яко виде в тебе,
отче Иоанне, новаго светильника и
молитвенника за Церковь нашу и за вся яже к
тебе прибегнет с молитвою и прошением,
ходатая ты имея пред Господом.
Юный возрастом был еси отче, но разумом
старцы превзошел и мудро лето своея юности
проводя под кровом храма Покрова
Богородицы, Ея же яко лучезарную зарю в
сердце своем имел еси, ныне же предстоиши
Престолу Царя Славы со ангелы и лики святых,
молим тя спастися молитвами твоими.
Богородичен: Приими от уст скверных хвалу,
Дево Пречистая, Богородице чистая, Ты бо еси

миру защищение и спасение, прилежно молим
Тя спастися душам нашим.

Песнь 3.

Ирмос: Веселится о Тебе Церковь Твоя, Христе,
зовущи: Ты моя крепость, Господи, и
прибежище и утверждение.

Разум твой отче просветлен бысть, яко дивно
позна силу Божию, излианную благодатно на тя
Духом Святым, Его же действием и мы
просветимся, отче всеблаженне Иоанне.

Аще и низу шествовал по земли, но сердце
пребысть горе, волю Божию исполняя, пастырь
добрый был еси стаду Христову, да и нас
сопричтеши ко избранным овцам твоим, святче
Божий преблаженне.

Возлюбив мудрости начало — страх Божий, и
заповедям Его присно поучаяся, древом добрым
насадился еси при исходящих вод духовных, от
них же, отче, напояем, плод Христу принесся
еси.

Богородичен: Егда прииде Христос судити люди
Своя, тогда и Ты, Пречистая Дево, буди ми
помощница и молитвенница в день страшного
Суда Божия.

Седален, глас 8:

Веры православныя украшение, церкви Божия похвало и удобрение, отче праведный Иоанне, вся страждующия от себе не отверг еси и помощь духовную и телесную всякой душе христианской в жизни временней подавал еси. Ныне же душею преселился во обители Отца Небеснаго, телесем нетленным с нами пребывавши, да и мы прибегаем в скорбях и радостях наших к тебе, делателю добрый винограда Христова, не остави и нас, сирых и убогих, вопиющих Ти тако: отче праведне Иоанне, спасай нас молитвами Твоими.

Слава, и ныне, Богородичен:

О Тебе радуется, Благодатная, всякая тварь, ангельский собор и человеческий род, освященный храм и раю словесный, девственная похвало, из Нея же Бог воплотися и младенец бысть, прежде век сый Бог наш: ложесна бо Твоя престол сотвори и чрево Твое пространнее небес содела. О Тебе радуется Благодатная, всякая тварь, слава Тебе.

Песнь 4.

Ирмос: Вознесена Тя видевши Церковь на Кресте, Солнце праведное, ста в чине своем, достойно взывающи: слава силе Твоей, Господи. Данный обет жития постническаго добре соблюл

еси, аще и в мире пожил еси, но духом яко в пустыне пребыв, показуя нам путь правый ко спасению, исправить нам житие наше на Тя зряще.

Ныне наста время ко Христу всем сердцем прилепиться и исполнити волю Его, твоему последующе примеру жития святого, сие и в мире живуще отвержемся мира сего, и мир пустынею соделаем ко спасению душ наших. Отверзи наш разум твоими молитвами, отче праведне, да и мы познаем волю Творца Небеснаго, блудное житие наше исправим и новую песнь Ему воспоим: молитвами праведника, Господи, спаси души наша.

Богородичен: Млеко питала еси, Дево, плотоносца Твоего Бога рожденного, яко да болезнь Адамову, сущую во аде, облегчит, от древа снедша знания и заповедь преслушания.

Песнь 5.

Ирмос: Ты, Господи мой, свет в мир пришел еси, свет святой обращающий из мрачна неведения верою воспевающий Тя.

Утишение бысть людям православным, отче Иоанне, егда славне мощи твоя обретоша, тогда воздаша хвалу Богови, и труды твоя со молитвы воспеша, почитающе, блаженне, память твою. Имел еси мудрование во благочестии, свыше

сподобился Божественного откровения, приходящих в вере наставляя и к покаянию всех призывая, возлюбити ближняго своего и брата не осудити, сподоби, блаженне, и нас сие исполнити.

Очесами зрим нетление телесе твоего на земли, имеюще мощи твоя святыя, яко залог любви ко стаду своему, дарова нам их Господь Промыслитель о людях своих, да взирающе на тя и мы исполним волю Его.

Богородичен: Агнице нескверна явилася нам Пресвятая Дево, яко плотию Христа родила еси, да тако и Дева в рождестве и по рождестве пребыла еси. Спаси и нас вопиющих: Мати Божия, слава Тебе.

Песнь 6.

Ирмос: Пожру Ти со гласом хваления, Господи, Церковь вопиет Ти, от бесовския крове очищшися, ради милости от ребр Твоих истекшею Кровию.

Наслаждатися небеснаго лицезрения Владыки Христа Бога нашего сподобился еси, блаженне Иоанне, в райских чертозах пребываеши днесь, телесем же твоим не оставил нас, грешных.

Нов явился ревнитель, яко второй Моисей, не знаменми страшными удивляя, но Божественных словес учении наставляя, тихому

пристанищу новаго Израиля от страстей Египта нас изводя.

Ум и душу твою направил к горнему Иерусалиму и нас сему поучал, блаженне Иоанне, како есть угождати Господеви и работати единому Господину, Творцу и Создателю нашему.

Богородичен: Помышляю Владычице страшное и скверное деяние мое и плачуся дел моих горько, но молитвами угодника твоего Иоанна, да очистит Сын Твой, Христос Бог наш, душу мою от скверны и похоти блудяыя.

Кондак, глас 6:

От чрева матери дивно прореченный, избранник Божий явился еси, не токмо в житии Богом прославленный, но и по смерти нас не оставивый в дивном явлении руце за род православный ко Христу простирая, молися Владыце всех Царю, помиловати нас, чтущих святую память твою.

Икос:

Дух Святый во пророцех глаголавый и апостоли всю вселенную просветивый, мучеником крепость даровавый, и чрез святители веру православную уяснивый, Той же Дух и тя ко Христу приведе, обильно излился на тя в житии твоём, ревнитель бо апостольских писаний был

еси и преподобных отцев, похвало святителей и праведных сослужитель, Ангелов небесных сожителю, душу свою уготовал еси Господеви. Ныне же в небесных чертозах обитаеши, в телесе нетленном на земли почиваеши, не остави и нас грешных, почитающих присно святую память твою, отче праведне наш Иоанне.

Песнь 7.

Ирмос: В пещи авраамстии отроцы персидстей, любовию благочестия паче, нежели пламенем опаляеми взываху: благословен еси в храме славы твоея, Господи.

Едем отверзся тебе отче Иоанне, еще сый пребывая на земли телесем, но духом в Царствии Божиим обитал еси, пищи сладкия Царския, и нас не остави молитвами твоими. Солнце праведное возсиял еси, отче, в мире сем, благодать дара прозрения от Господа сподобился еще на земле сый, многих от бед отвращая, отврати и мое сердце от злых дел мира сего. Наше спасение Господь устрояя, пастыря добраго нам тебе показа, праведне отче Иоанне, да и мы последуем примеру твоему, обрящемся яко пастыри добрии, а не хищницы.

Богородичен: Пресвятая, Слово Святое рождающая, освяти наша души и телеса, блажащих Тя, Всенепорочная.

Песнь 8.

Ирмос: Руце распростер Даниил, львов зияние в рове затче: огненную же силу угасиша, добродетелию препоясавшеся, благочестия рачители отроцы взывающе: благословите вся дела Господня Господа.

Роса благодатная, душу твою ороси, отче блаженне, очисти и наша помышления сердечныя, да тобою наставлями Богу взываем: благословите вся дела Господня Господа.

Аще и забвена быша память твоя, но Господь дивно прослави тя вновь, мы же Божие помышление о людях зряще, созерцая высшую мудрость Его, присно Ему взываем: благословите вся дела Господня Господа.

Возшел еси на высоту небесную и нас на земли не оставил, телесем нетленным с нами почиваеши, мы же зряще дивные дела Божия, во умилении сердцем взываем: благословите вся дела Господня Господа.

Богородичен: Единая имущая дерзновение, Владычице, за весь мир Христу молишися, не помяни бесчисленных наших грехов, покрый люди Твоя омофором, вопиющая Богу умильным гласом: благословите вся дела Господня Господа.

Песнь 9.

Ирмос: Камень нерукосечный, от несекомья горы Тебе Дево краеугольный отсечеса, Христос, совокупивый разстоящаяся естества. Тем веселящеса Тя, Богородице, величаем.

Доброту видевше в тебе, отче праведный, притекаше к Тебе вдовы и сироты, яко не оставиши их без помощи у тебе просящих, но даруеши им на потребу, да прославят Творца во веки.

Нищету духовную возлюбил, отче Иоанне, паче нежели богатство земное. Неимущим сие подавал еси, подаждь и нам твоими молитвами духом разумом и благочестием, да и мы сподобимся с тобою пребывати, идеже дух твой веселится.

Умильно молим тя отче наш Иоанне не остави нас погибнути в мире сем, не попусти стаду твоему ввергнутися в море страстей, но твоими молитвами и мы обрящемся в рай с Тобою.

Богородичен: Юницу светлейшую и голубицу нескверную воспоим Пречистую Деву Марию, плотию родшую нам Христа Бога нашего, спасение бо Господь содела, Христос в вышних к нижним чрез Нея преиде, не рушил ключи девства Пресвятыя.

Светилен, глас 7:

Просвети, праведне, наша сердечныя очи,
возрети на Божественную доброту. Освяти наша
души и телеса, да достойно песнь хваления Тебе
приносим. Молися, отче наш Иоанне, за чтущия
Тя и верою почитающих память Твою,
присноблаженне.

Слава, и ныне, Богородичен:

Радуйся, Тебе зовем, Благословенная Богородице
Деве, яко Тобою вечныя радости пречастницы
быхом, из Тебе бо возсия Христос Бог наш, да
сиянием славы Отчия, просветит души наша.

На хвалитех стихиры на 4, глас 4:

Ныне наста время, прославляющее угодника
Божия, совокупимся едины усты и единым
сердцем, и тако возопиим тебе, отче: житие твое
бысть славно и успение со святыми, Ангели
Божии взяша пречистую душу твою, ко Творцу
ю непорочну вознесоша, да вселишися со
святыми воспевати вечно хвалебную песнь Ему:
Господи, слава Тебе.

Отче блаженне, радостию велию возрадовашася
превеликое множество чад твоих, днесъ
совокупльшеся в храме, яко прославити святую
память твою, Ты же, священниче Божий, не
отыми милость твою от нас, но даровании

Божественными излей богато ю на стадо сие, яко молишися за овцы пажити твоея, юже Господь тебе уневести.

Днесть прославляем угодника Божия Иоанна, руце к небу воздевши, от сердца чиста и нескверна ко Господу зовем: слава Тебе, Господи, давшего нам звезду путеводящую: слава Тебе, Господи, показавшему нам свет в нощи: слава Тебе, Господи, прославивша праведнаго нетлением телеси: слава Тебе, Господи, приявши новаго молитвенника за ны грешныя.

Воздержанием и болезнями, скорбями и бедами многими, в молитве непрестанной душу и тело очисти, священниче Иоанне, сосуд избранный перед Богом явился, веру православную исповедуя, не токмо словом, но и житием образ бысть пастве твоей, тем же и прослави тя Господь, яко вернаго и добраго пастыря стада Его.

Слава, глас 6:

Припадаем ти, отче блаженне, взывающи к тебе: не остави нас убогих, в странствии земнаго жития сего. Утоли наша скорби и печали, приими слезы покаяния и любви. Подаждь нам от Всемиловитаго Спаса, твоими молитвами, пастырем ревность о Церкви Православней, всякой душе христианстей мир и благоденствие,

да пребывше в радости душевной, прославим Господа, прославившего тя.

И ныне, Богородичен, глас той же:
Днесь мне возсияй свет разумного веселья, Ты бо еси Чистая свет и живот сущим во тьме: хотению бо мощна еси, и еже творити имаши яко сущи всех Владычица, избави всех от бед, и всех скорбящих от соблазн лукавого.

На литургии

Блаженны от канона на 8, песнь 3 и 6.

Прокимен, глас 7: Возвеселится праведник о Господе и уповает на Него.

Стих: Услыши, Боже, глас мой, внемда молитимися к Тебе.

Апостол, Соборного послания Иоаннова, зачало 73 (глава 4, стихи 7 – 11).

Аллилуарий, глас 4: Готово сердце его уповати на Господа.

Стих: Благ муж щедре и дая.

Евангелие от Луки, зачало 26 (глава 6, стихи 31 – 36).

Причастен: В память вечную будет праведник, от слуха зла не убоится.